



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma : Tir Yimiyim

tiryimiyim@aolima

tir yimiyim

TAPAK 3

US State Department ketdangsür anema Khan-i ken o benoktsü

Ni jail nung liaka AAP-i Delhi nung takok angutsü: Arvind Kejriwal



VOL. XXI NO. 42 (ADOK 42) DIMAPUR AMUNGNÜ (SUNDAY) YIMPOKSÜI (NOVEMBER) 19, 2023 ₹ 5.00

ENPO den Hornbill Festival atema senden amen

Dimapur, November 18, 2023 (DIPR): Eastern Nagaland-i Hornbill Festival 2023 nung shilem magitsü ta asüba atema November 18, 2023 nü Tourist Lodge Dimapur nung senden ka menogo.

Sangtam-i anir ketdangpur 7-i iba senden nung aden aser idangji Nagaland sorkari parnok dang Hornbill Festival 2023 nung adentsü mepishi.

Senden nung Tourism Minister aser Art and Culture Advisor na aden.

ENPO President R. Tsapikiu

Manipur sorkari mobile Internet shibangba atsülang

Imphal, November 18, 2023 (Agencies): Manipur state sorkari November 23 tashi mobile internet services shibangba atsülangtsü telemtetba agiogo.

aitba osangtem DGP-i lemsatsep. "November 23, 2023 aonung 7:45 ako tashi Manipur nung anogo pungunü mobile internet/data services, internet/data services through VPN shibangtsü" ta Commissioner Home T Ranjit-i sangdong ka nung ashi.

Director General of Police, Manipur ajanga state nung law and order tensa mejungi aliba osang agütsüba sülen state sorkari iba lemtet agi.

State sorkari tensa junga aliba district headquarters kar nung trial basis ama mobile towers kar lapoktsüogo aser iba ya Manipur High Court-i tuyuba ama lir.

Manipur nung security forces amakba, nisung samaba atema lungkak aitba, highway mokdangba aser mener lungkak

NGO Co-ordination Committee-i 'counting date' melenshitsu akhanger

Aizawl, November 18, 2023 (Agencies): Mizoram nung NGO Co-Ordination Committee-i December 3 counting anogo melenshitsu atema takhangba agütsüshio.

Onoki poll counting date melenshitsu mepishiba magizükra onoki mapa tuluba inyaksü ta parnokisa ashi.

November 18, 2023 nü Central YMA Committee room nung senden ka amenba sülen parnoki iba ya metetdaksü.

Committee-isa MKHC (Mizoram Kohhran Hruaitute Committee) mesüra Church Leaders Committee dang parnok pusema nungittsü ayongzükogo.

NGO Co-Ordination Committee-isa New Delhi nung Election Commission of India ketdangsürtem den senden ka amentsü tebilemba metetdaksü.

NGOs aser tamangba yimsü lennirtem külemi yaritepa inyakra counting anogo melenshitsuabaji takoktsü lir ta NGO Co-Ordination Committee-isa ashi.

Manipur opposition party 10-i Governor den ajurutep

Imphal, November 18, 2023 (Agencies): Manipur nung Congress Legislature Party leader aser taoba chief minister Okram Ibobi Singh-i anir opposition telok 10 nungi teshimtet telok kati Governor Anusuiya Uikey den ajurutep.

Manipur state madak ketdangsür ka ama Governor Uikey-i Prime Minister dang kin ana tsünga olemtep tenzüksü atema jembitsüla" ta parnokisa metetdaksü.

Parnoki Governor Uikey dang Manipur nung yimjung aser tensa süngjemtsü ayongzük.

Opposition party 10 lennirtemisa Governor dang Manipur nung political party ajak den Prime Minister Narendra Modi dena senden ka ayonga amentsü mepishio.

Ibobi Singh den taoba deputy CM Gaikhangam, MPCC President K Meghachandra, JD(U) lennir Dr Nimaichand Luwang aser AAP, AIFB, AITC, CPI, CPI(M), NCP, RSP, SS (UBT) lennirtem aden.

Governor-i akokba tashi relief camps nung alirtem yaria aruba atema pelar ta parnokisa ashi.

Parnoki Governor Uikey nem memorandum ka agütsüba nung kin ana tsünga yimjung olemtep tenzüksü takhangba agütsü.

Governor Uikey-ia opposition party temi ashiba angaba sülen Manipur nung yimjung bener arutsü atema kin ana den olemtep tenzüksü atema mapa inyaksü nangzük.

"Centre sorkar aser talisa Prime Minister-i tiyongtsüi aita mapa meinyak tashi Manipur nung yimjung malitsü. Anungji

"Olemtep alitsü asoshi inyaksü aser Prime Minister-i political party ajak den ajurutepa senden amentsü asoshi merangtsü" ta laisa nangzük.

Asia Pacific Baptist Federation küm 50 jungogo



Nagaland nungi teshimtet nübotem den Aeterna Singers külemi agiba noksa ka angur.

Dimapur, November 18, 2023 (TYO): Asia Pacific Baptist Federation küm 50 ajungba benjung Singapore nung anogo ana tashi monger Honibar nikongdang tembangogo.

Iba benjung ya "Imagining the future together" omen nung ajemdaker among.

APBF President Rev. Mark Wilson-i tesentepertem den 'APBF - imagining the future' onük jemi aser sentong nung adenertemi Israel o Palestine rara aser Manipur tensa indang benoka lemsatsep.

Nagaland nungia teshimtet telok ka iba benjung nung oa aden aser parnok rongnung Commissioner and Secretary Y. Kikheto Sema dena lir.

"India sorkar aser NSCN-IM tsünga ceasefire aliba maparen nung AFBF-ia tongti shilem agia

lia ta Kikheto Sema-i tangar den jembidang ashi" ta NE Live reporter Sarah Konyak-i sangdong ka nung ashi.

1996 küm mungdang amongdang Nagaland nung nisung tepsetba tatalokba kanga bulua liasü. Onoki mungdang nung aden aser idangji Asia mangatettep indang onüktem lemsatsep. Dr. Wati Aier, Bony Resu aser Rev. Dr. Pongshing nungeri AFBF mungdang nung adenba 1997 küm ceasefire agitetsüsa mapangbener aru aser iba atema parnok dang pelar" ta Kikheto Sema-isa ashi.

"Asia külemi longjemtsüla, alima longjemtsüla aser asenek melongjemra tarutsü mali" ta paisa ashi.

"Iba mungdang nung teshimtet nübo teimtiba arur rongnung Nagaland dena lir aser

Aeterna kentenertemi shilem tajung agiba atema tenüngsang agütsür kechiyong parnok aliba ajanga onok adenba tali shisangogo" ta Kikheto-isa ashi.

Asia Pacific Baptist Federation (APBF) mungdang nung linük 17 nungi teshimtet nübotem aden. Nagaland nungia Nagaland Baptist Church Council (NBCC) General Secretary Rev. Dr. Zelhou Keyho-i anir arogo balala nungi lennirtem aden.

Maneni Nagaland nungi Aeterna Singers founder aser artistic director James Shikiye Swu-i anir kentenertemi anogo ana benjung nung shilem balaka agia liasü.

APBF ya Baptist World Alliance (BWA) indang regional organisation ka lir. Asia Pacific region kübok linük 22 nungi arogo 40,000 aser Conventions 65 tashi züngsema lir.

Kuki teloktemi ITLF tanishir anema FIR benokba aitsür

Guwahati, November 18, 2023 (Agencies): Manipur police-i ITLF general secretary Muan Tombing anema FIR benokba aitsür ta Committee on Tribal Unity (CoTU) aser Indigenous Tribal Leaders' Forum (ITLF) teloktemi metetdaksüogo.

Kuki nunger teimba ser aliba district tem nung "separate administration" tenzükera Muan Tombing-i ashiba atema Manipur police-i FIR benok.

"Iba ya ozünga aibelena amshiba ajanga Kuki-Zo movement azüoktsü merangba inyakyim ka dang lir. Iba ama inyakyim ajanga kin o kin mepetmesü tamajungba akümtsü aser Manipur nung law courts tenüng menüktsütsü. Anungji Supreme Court, National Human Rights Commission, National Commission for Schedule Tribes aser tanga Constitutional bodies-i minority anema inyakba atema tebang aitsüla" ta CoTU media cell sangdong ka nung metetdaksü.

Manipur nung ozünga alema nisung aika aruba ajanga tensa mejungi aküm ta External Affairs Minister S Jaishankar-i jembiba olen ka COCOMI ajanga tawa metetdaksüogo. Military Junta

tesep ka nung Moirangthem Premananda ta ser tenüng aliba Indian Aadhaar card ka den Meitei nunger telungpur teloktem indang wako aser combat dresses anguba atema Jaishankar aoksatsüla" ta CoTU-isa ashi.

"Myanmar nung amenoka aliba Meitei teloktemi arrtsü adener Manipur nung Indian Army amakba atema External Affairs Minister aser Union Home Minister na aoksatsüla. Ozünga noktanga aliba Meitei telok balala nung züngsemtem sorkari arrtsü adena arudaksür aser Kuki-Zo nunger amaker" ta CoTU-isa metetdaksü.

"May 3 nungi Kuki aser Meitei nunger tsünga rara tenzükba sülen onoki 'Meitei sorkar' nungi ketdangsübaren balaka meshir. Onokisa kechi lemtet agidir agiaka Constitution of India kübok asütsüla ta ashir anungji onoki India sorkar anema rara ayonger ta asüba kuli kecha mali" ta ITLF spokesperson Ginja Vualzong-ia ashi.

Taoba mapanga Manipur police-i lisopur ola madokdaksütsü atema ITLF chairperson aser spokesperson anema FIR benoka liasü ta Ginza-isa ashi.

"Meitei nunger teimba ser aliba tesemtem nung Kuki-Zo-Hmar civilian tem tepset aser taküm kümzükertem kar pei talidak toktsür jena aotsüsa aküm. Onok dang ozünga alema arurtem ta ajar aser Meitei civil society ajanga onok anema rara tenzükogo. State sorkar aser police-ia yimjak nung Meitei nunger pusema nungiter aser police commando temi lisopur yimtsüngtem amaker" ta Ginza-isa metetdaksü.

Chief minister-i yaria terenlok mapa inyakba NGOs-i lisopur terenlok atema aruba senotsü tangalen amshitsü meranger ta paisa ashi.

October 23 nü Chief Minister-i Union tribal affairs minister Arjun Munda dang Imphal nung amenoka aliba Meitei NGOs nem sen crore aika alangba mapatong 6 lemtüksütsü mepishi. Ajisüaka telok kati danga lisopur atema meinyaker. Külen Manipur state education minister-ia Meitei activist ka dang school kaket nung Kuki indang tapak ka agientsü ashi aser iba ya lisopur putiotsü samatsütsü merangba inyakyim ka lir" ta ITLF spokesperson Ginja-isa ashi.

(Maneni tapak 8 nung...)

Kohima nung State Level Painting Competition ali



Kohima, Yimpoksüi/Nov. 18 (TYO): Tanü Bureau of Energy Efficiency, Ministry of Power, Government of India, State Nodal Agency North Eastern Electric Power Corporation (NEEPCO) Ltd ajanga Energy Conservation indang nung State Level Painting Competition sentong ka Kohima nung ayongzüka liasü.

East Gate Hotel indang Conference Hall nung sempet aliba sentong nung jembidang, Principal, Science College Jotsoma, Kohima, Temjenwabang-i energy conservation ya energy ajema agitsü merangba dang ajar, ta ashi.

Energy kumdanga aser ajema agiba aser conventional energy sources nungi energy ajema agiba ajanga iba ya inyaktettsü, ta pai ashi.

Energy conservation ya jenjang balala nung inyaktettsü aser itemji domestic/household level, community level, industry level aser transportation level nung lir ta ashi.

Domestic level nung energy kumdanga amshitsü asoshi rangloker jembidang, asen kidang asen yinya melenshiba ajanga itemji koktettsü ta ashi. Pai ashiba agi, refrigerators shibanga ayuba, Incandescent bulbs melen energy ajema agiba CFL aser LED light amshiba, takdang yutsür aodang

light shibangba mesüra energy ajema atsükba oset amshiba, mamshidang osettsüset balala agizüka ayuba ajanga energy ajema atsüktsü, ta ashi.

Renewable energy sources amala dangi melenba ajanga energy shilem 40 tashi wazüka yutettsü, ta pai ashi.

Iba nung pai nisung ajakdang aser talisa kaketshirtem dang alima kumzüka ayutsü aser tali shia alitsü asoshi ambassador akumtsü ayongzüka liasü.

Executive Director NEEPCO and Head of DHPS, John Zelaing; Wotsa Fine Arts & Training Centre kibur Hekuto Wotsa aser Deputy General Manager (C) Dalim Barman nungeria kaketshir aser tsürabortem den tayongzüka o jembia liasü.

Tetoktepba nung takok angurtem yamai alitsü:

Group A (Class 5-7): Mezüngbuba Anushka Paul (St Mary's HSS Dimapur), tanabuba Demosmita Sarkar (Chitrakala School of Fine Arts, Dimapur), tasembuba Shrestha Sarkar (Holy Cross HSS Dimapur). Consolation prize winners: Lhuvese Medeo (GHS Yoruba, Phek), Sangmeiyenla (Community Education Centre School Dimapur), Vivika H. Yepthomi (Holy Cross HSS Dimapur), Nikito Yeptho (Cornerstone School Dimapur),

Sujata Das (St Mary's HSS Dimapur), Masuma Yasmin (St Paul School Dimapur), Krishtina Singha (Little Star HSS Dimapur), Anamika Ghose (Little Star HSS Dimapur), Shara Ghosh (Holy Cross HSS Dimapur) aser Mohit Bhattacharjee (Chitrakala School of Fine Arts Dimapur).

Group B (Class 8-10): Mezüngbuba Ayushi Bhowal (Livingstone Foundation International School, Dimapur), tanabuba Zaara Abdul (Home Academy Dimapur), tasembuba Jhalak Khemani (Holy Cross HSS Dimapur). Consolation prize winners: Ripikali H. Yepthomi (Holy Cross HSS Dimapur), Bhavya Jindal (Holy Cross HSS Dimapur), Nandant Mahato (Ram Janaki HSS Dimapur), Ruchi Rankawat (St Mary's HSS, Dimapur), Shrishant Debnath (St Mary's HSS Dimapur), Temjensola Walling (Livingstone Foundation International School, Dimapur), Ilokali Assumi (Chitrakala School of Fine Arts, Dimapur), Ruokuosalie Miario (Bayavü HSS Kohima), Imkongsenla (Little Star HSS Dimapur) aser Jekivi (Lorna's HSS Dimapur).

State Nodal Officer aser Deputy Manager (HR) Laishram-i iba sentong nung melepzüng o jembia liasü.

Wokha nung 70th All India Cooperative Week amung

Dimapur, Yimpoksüi/Nov. 18 (TYO): Wokha nung aliba Assistant Registrar of Cooperative Societies ajanga "Role of Cooperatives in making India a \$5 trillion Economy and SDGs" omen nung ajemdaker Deputy Commissioner, Wokha indang Conference Hall nung November 18, 2023 nü 70th All India Cooperative Week Celebration 2023 ayongzüka liasü.

Tesemdanger tongti ka ama iba sentong nung jembidang K. Furhesie Nyuwi, ADC Hq Wokha ajanga ashiba agi, Cooperative Society tem takok anguba otsü; l ajanga state mesüra linük ka indang rongsenketzüng jenjang sayur.

Pai Cooperative Society tem dang kaket nungdang melie ochishia bendanga agütsür mapa inyaktüsü, maongka yanglutsü aser mapa inyakba yinya süpatsü ajungshia liasü.

ARCS Wokha, Obendangba-i pela agizükba o jembidang Wokha district nung Cooperative Society 600 dak tema lir aser yangji nisung balala lungjemer rongsenketzüng tsütsü pei tejangraba külemi inyaker, ta ashi. Pai parnok dang tanen makai meranga inyaktüsü aser nükjidong atongtsü ayongzüka liasü.

T. Alanthung Ngullie, SRCS Wokha ajanga iba sentong ayongzüka nükjidong aser teratet ashidang, hopta tepiyong iba benjong amungba ajanga Cooperatives temi pei takok anguba, project balala inyakba otsü ashitsü mesüra sayutsü maongka agütsür aser tarutsü nung inyaktüsü sentongtem takzür, ta ashi.

Cooperative terenlok aser nüburtem nem workshops, seminar aser "Cooperatives in making India a \$5 trillion Economy and SDGs" omen den apet maparen balala inyaka nüburtem nem awareness agütsür, ta ashi.

ARCS Wokha aser Cooperative Bank, Wokha indang manager-i yariba asoshi Multi-Purpose Cooperative Society, MPCS Ltd. Agri Colony, Wokha indang secretary Sulanthung N. Ngullie-i pelaba shisem.

Paisa society ainba indang tongmelang agi osang agütsü aser yangji ango metsürtem, fabrication shop lapoka aliba, rubber aser beetle nut plantations amenokba, Digital India ajanga Common Service Centre amenokba dena lir.

Iba sentong nung Cooperative Society züngsem 100 dak tema dena liasü

MR vaccine ya tanur asoshi kanga tongtipang lir

Dimapur, Yimpoksüi/Nov. 18 (TYO): Linük ajanga den külemi Nagaland nunga December 2023 tashinung Measles Rubella Elimination takok angutsüsa bendanga agütsür inyaker.

Iba nükjiding ya measles aser rubella tashidak menatapa aoba okshia samadaktüsü aser MR vaccinations shilem 95 jungdaktüsü lir.

Dr. Imkongtemsu Longchar, State Immunization Officer, Directorate of Health & Family Welfare ajanga sangdong ka nung ashiba agi, MR vaccination ajema agiba tesemtem asadanga April-May aser August-September ita MR Elimination drives agia liasü. Mop up vaccination ya November 20-30, 2023 anogotem agitsü sentong lir.

MR vaccines ya tanurtem nem ita toku (MR1) lia khen aser ita 16-24 (MR2) nung khen agütsür. Tanur kati dose ka agir tanabuba dose ya magira, iba dangji Left-Outs mesüra Drop-Outs ta ajar.

Vaccination ajanga tajangzük ajak agitsü asoshi immunization dose ajanga agitsüla. MR1 aser MR2 magi aliba tanurtem arishi küm 5 majung tashi agitettsü.

Ajungji MR Elimination Drive ya tanur ita tuko nungi küm pongu tashi asoshi MR1 aser dropped out children asoshi MR2 dose agütsür ta ashi.

State data nung MR1 dose ya shilem 96 aser MR2 ya shilem 92 nung lir, saka yangji district shia balala lir aser district ajak nung coverage shilem 95 dak tema asütsü meranga inyaker, ta sangdong ajanga ashi.

Takum kumzüksüba mozü agi tanur kata mezüdoktsü aser measles aser rubella nungi kumzüksü asoshi Left-outs aser Drop-outs tem jangjateta mozü

agütsütsü meranger. Iba tapok ateptsü asoshi State nung Intensified Mission Indradhanush (IMI) nungja agütsür intensive vaccination rounds asemben agiba den teti ama Routine Immunization (RI) sentongtem cases putetba tesemtem nung health units nung agüja arur aser special immunization drives ayongzüka arur, ta ashi.

Awareness peria maliba aser temang nung timtem ajurutsü tetsübo agi kibong timba nung iba mozü course tema magir ta State monitoring data ajanga ashir. Tanur kar ajem agidak tera merema mesüra awaker aser kar temang tera aronger, saka aji yinya dang. Item timtem ya pa sasa samatsü. Temang arongba manenna, tsürabor temi healthcare workers den asüngdangya asütsüla. Iba mozü agitsü asoshi asenok ajak lungjemer inyaktüsü nungdaker, ta sangdong ajanga ashi.

Iba services agitsü asoshi nüburtem nem awareness agütsütsü tongtipang lir. Tanurtemi iba mozü mapang shidak nung agiba ajanga tajangzük anguba nüburtemi meteta alitsüla. Mozü ya government health facilities nung angati angur aser iba mozü magi mesüra ka dang agir aliba tanurtem iba tashidak agi mela-mela meneptsü ta angatettsüla, ta ashi.

Immunization mapa inyaktüsü asoshi nüburtem nungi teyari nungdaker, aser sendaktepa aliba department tem, arogo, lokti tentet, putu menden, tetsür lenirtem aser IMA, IAP, IDA, Rotary, Lions Club züngsemtem aser nüburtem dang arishi küm 5 tekübok tanur ajak nem iba mozü agidaktüsü ayongzüksüla, koba Government Health Units tem nung agitsü lir, ta sangdong ajangasa ashi.

LFI nung temesepba mozü indang awareness sentong ayongzük



Dimapur, Yimpoksüi/Nov. 18 (TYO): Livingstone Foundation International, Dimapur nung November 17, 2023 nü Awareness Programme on Reducing Drug Use Among Children and Adolescents ayongzüka liasü.

Iba sentong ya Livingstone Foundation Society den North Eastern Regional Youth Commission (NERYC) ajanga Indian Catholic Youth

Movement North East (ICYM NE) aser Nagaland Catholic Youth Movement (NCYM) den lungjemer Veronica Nriame, Psychiatric Social Worker, Naga Hospital Authority, Kohima lenisüba nung agia liasü.

La ya NCYM nung Joint Secretary lir aser ICYM nung Female Representative lir. La den iba sentong nung Paul Magh Rengma, Music Secretary, NCYM ajanga

yaritepa liasü, shiba PWD nung LDA lir.

Iba sentong ya nikongdang 1:00 ako nungi tenzük, kong kaketshir den tesayurtem dena liasü aser iba mapang temesepba mozü achi-ajemba nungi pila alitsü indang onük balala nungi awareness agüja luasü.

Shisalen sayur temisa kaketshirtem dang iba timtem nungi jenbua alitsü aser life skills education sayua liasü.

Madhya Pradesh election nung voters shilem 76.22-i vote agütsü



November 18, 2023 nü Bikaner nung Madhya Pradesh assembly election nung duty lemzükba Seema Grah Raksha Dal sepaitemi vote agütsü atema tarensena nokdaker aliba noksa nung angur.

New Delhi, November 18 (Agencies): Hokolbarnü Madhya Pradesh assembly election nung voters shilem 76.22-i vote agütsü, aser ibaji Madhya Pradesh puti otsü nung voters shilem teimtibai vote agütsüba lir, ta Honibarnü election ketdangsertemi metetdaksü.

Hokolbarnü assembly menden 230 atema election agiogo.

1956 küm Madhya Pradesh state tentetba sülen voters shilem teimtibai vote agütsüba Hokolbarnü liasü. 2018 küm assembly election nunga voters shilem 75.63-i vote agüja liasü, anungji ibaji shilem 0.59 agi teimba lir.

State kübok Seoni district nungbo voters shilem 85.68-i vote agütsü aser voters shilem

ishibai vote agütsübaji Alirajpur district nung liasü (shilem 60.10).

Maoists telungpurtemi timtem agütsüba Balaghat district nunga voters shilem 85.23 agütsü, aser ibaji ajanga Maoists indang injang dang nungibo vote tashi tuluba liasü ta temaitsü sayur, ta election ketdangsertemi metetdaksü.

2003 küm nungi tenzuka Madhya Pradesh assembly elections nung Bharatiya Janata Party (BJP)-i asemben tashi takok angu aser Congress-ibo khen dang takok ngua lir.

2018 küm assembly election nung BJP-i vote shilem 41.02 angu, Congress-i vote shilem 40.89 aser BSP den tanga party temi vote shilem 10.83 dang ngua liasü.

BJP-i vote shilem teimba anguyonga parnoki menden 109 nung dang takok angu aser Congress-i menden 114 nung takok ngua liasü; tanungba mendenji BSP, Samajwadi Party aser Independent candidate temi angu.

Iba sülen Congress-i BSP, SP aser independent teyari agia sorkar aküm saka 2020 küm March ita nung taoba mapang Congress lenir Jyotiraditya Scindia den MLA kari sorkar anema apusoba ajanga Congress sorkar chirep aser Shivraj Singh Chouhan leniba nung BJP-i sorkar aküm.

2020 küm Jyotiraditya Scindia-i pa pusemer MLA kar anisemer Congress party toktsüba ajanga Kamal Nath-i aniba sorkar chirepa liasü.

Cyclone 'Midhili' süngjema kümogo

New Delhi, November 18 (Agencies): Cyclone 'Midhili' tashi meiti süngjema kümogo; iba yipru mopung Bangladesh tziyikümlen süiba sülenbo süngjemogo, ta Honibarnü IMD (India Meteorological Department)-i metetdaksü.

Iba yipru ajanga Hokolbarnü Tripura aser Mizoram na densema northeast India tesem aika nung tziunglu arua liasü, saka Honibarbo tesem aika nung tziunglu maru.

Hokolbarnü West Bengal kübok South 24 Parganas district nunga tziunglu aru saka Honibarbo tziunglu maru, ajisüaka MeT Department-i angopurtem dang tziyimi angopui maotsü tekümdangtsü metetdaksür liasü.

Honibarne IMD-i, "Midhili yipru Tripura aser Bangladesh nung süngjema akümba sülen Silchar nungi kilometer 160 aser Agartala nungi kilometer 50 shi pilar lir. Taruba ghonda 6

tziungda south Assam aser Mizoram-Tripura nung iba yipru ya WML (well-marked low pressure area) akümsü," ta metetdakja liasü.

Iba yipru ajanga tziunglu sashia aruba den mopung sashia aonba ajanga Hokolbarnü Agartala nung aliba Maharaja Bir Bikram Airport nung tayimtsü asem manenteti liasü, ta Airports Authority of India (AAI) nungi ketdangser kati metetdaksü.



November 18, 2023 nü Uttarkashi district nung Silkyara aser Dandalgaon tziungda 'tunnel' chirepba tesem nung kümzükba maparen maneni inyakdar. November 12 nü iba tunnel chirepba jana agi yangji mapa inyaker 41 rembangba sülen tang tashi mekümzükte li.

India-Australia Ministerial senden November 20 nü amentsü

New Delhi, Yimpoksüi/November 18 (Agencies): Tanabuba India-Australia 2+2 Ministerial senden Hombarnü New Delhi nung amentsü; iba senden nung linük ana tziungda asalentong, defence aser security onüktem nung o lemteptsü.

2+2 dialogue senden ya Defence Minister Rajnath Singh aser External Affairs Minister S Jaishankar na den Australia Minister for Defence, Richard Marles aser Minister for Foreign Affairs, Penny Wong nung leniba nung amentsü.

Mezüngbuba 2+2 ministerial senden 2021 küm September ita nung New Delhi nungsa ayongzuka liasü.

Hombarnü senden nung linük ana tziungda tongtibang onüktem, regional aser international onüktem nung o lemteptsü aser India-Australia Comprehensive Strategic Partnership kübok amalitep jenjang tajungba akümsü atema jembitsü.

Defence Minister Rajnath Singh-i Australia Deputy Prime Minister Richard Marles den-a jurila senden ka amentsü tebilemba lir.

India semdangba mapang Marles-i November 19 nü Gujarat kübok Ahmedabad nung India aser Australia na tziungda Cricket World Cup Final asaya reprangtsü.

November 21 nü EAM Jaishankar aser Foreign Minister Wong na leniba nung 14buba Foreign Ministerial Framework Dialogue (FMFD) senden amentsü.

Tan ita tetenzüklen-a S Jaishankar-i Australia nung Opposition Lenir aser taoba mapang Defence Minister, Peter Dutton den senden mena linük ana tziungda tesendaktep aser international onük kar nung o lemtepa liasü; tenati Indo-Pacific region, West Asia aser Europe nung tongtibang onüktem atema-a jembiogo, ta ketdangsertemi metetdaksü.



November 18, 2023 nü Jaipur nung Rajasthan Chief Minister, Ashok Gehlot aser Congress Tir Mallikarjun Kharge nati yirua alir sorkar ketdangser, Harshadipati Valmiki ajuruba sülen osangbenertem den jembidang tangokba noksa nung angur.

Ni jail nung liaka AAP-i Delhi nung takok angutsü: Arvind Kejriwal

New Delhi, November 18 (Agencies): AAP tongti lenir aser Delhi Chief Minister, Arvind Kejriwal-i, ni jail nung puokyonga 2024 küm Delhi Lok Sabha election nung Aam Aadmi Party (AAP)-i takok angutsü, ta metetdaksü.

Delhi nung aliba Tyagaraj Stadium nung party nung inyakertem den jembidang Kejriwal-i, "Temelenshi adokdaksür ka atema jail ji tesem tajung ka lir. Ni jail nung anogo 15 shi mongogo. Ni atema ibaji kecha balaka masü," ta ashi.

Paisa party nung inyakertem dang yimti nung aliba ki ajak sema jajatsü aser nüburtem dang Kejriwal-i jail nungi maneni chief minister inyaksüla asü, ta asüngdang, ta metetdaksü.

AAP tongti lenirisa, BJP-i Delhi nung parnoki AAP tamakok mengudaksütetsü, ta meteta dang lir, ibayongji parnoki asalentong yanglua AAP lenirtem jail nung puoker, ta ashi.

BJP maneni aija Kejriwal-i, Lok Sabha election atema AAP nüboyim sentong menodaksütsü atema BJP-i pa pua jail nung puoktsü sentong yanglur; BJP-i tanga regional party tem nungi lenirtem anema-

a inyaksü, ta metetdaksü.

"Kodang regional party nungi lenir ka jail nung puokdir party atema nüboyimtsütsü atema shinga manüngtsü, aser BJP-i melamela takok angutsü. Ibayongji parnoki AAP election nüboyim nokdangtsü atema ni jail nung puoktsü sentong yangluogo," ta pai ashi.

Paisa, "Parnoki West Bengal Chief Minister Mamata Banerjee, Bihar Deputy Chief Minister Tejashwi Yadav aser Jharkhand Chief Minister Hemant Soren nungera jail nung puoktsü atema renemdar, ibaji ajanga BJP-i yangjia melamela takok angutsü," ta ashi.

Taoba mapang Delhi cabinet minister ana- Manish Sisodia aser Satyendar Jain na jail nung puokba dak sendakba nung pai, "Manish Sisodia-i linük nung shisaliok tsütsü temelenshi tulu adokdaksü, saka pa jail nung lir. Satyendar Jain-i health sector nung temelenshi adokdaksü, aser tang pa interim bail nung chioka lir. Tanü asen lenir pezü jail nung lir. Jail-i aitsü atema tetsübu. Tanü Sanjay Singh aser Manish Sisodia nati AAP toktsüra ghonda 24 tziungda tena jail nungi anitetsü," ta ashi.



TIR YIMYIM YIMOBILEM (EDITORIAL)

DIMAPUR AMUNGNÜ, YIMPOKSÜI (YIMPOKSÜI) 19, 2023

Sayatenya dak kija mamangba tamang

A tangji, asenoki amangba Yehovah Tsüngrem ya sayatenya Tsüngrem lir. Ajisüaka, Pa dang sayatenya ka sayutsü atema asüngdangbaji asen tamang ilaba temaitsü asütsüa akok. Tsüngrem dak jungjunga mamangertemi teti Tsüngrem nem sayatenya inyadaktüsener. Aji oda, nisung aikati Tsüngrem dang sayatenya mapa inyaksü asüngdangbaji tamang uluba agi inyaker amai bilemtsüa akok. Ano, karibo Tsüngremi teti sayatenya mapa inyaka sayutsü amai bilemer. Item purtem jagi shirangertem ajunga sayatenya agi aneptsü amai bilemer, mesüra tensa tia tamajung ajak nungi sayatenya agi kümzüksü amai bilemer. Ajisüaka, parnok temulungjang nungbo Tsüngrem dakbo mamanger. Anungji, kenü anogo Farisi aser Sadukitem Yisui dangi orr Pa atidanga, parnoki pa dang anüng nungi temaitsü ka sayuang ta asüngdang. Idangji, Yisui langzü, " tamajung aser nüktapangta putui temaitsü bushir, saka Yona temaitsü dak alema parnok nem kecha temaitsü magütsütsü. Aser Pai parnok toktsür ao." Iba tatalokba ya asenoki Laishiba Mathi tapu 16 nung shia angur. Item ama anemsü nisung, Tsüngrem dakbo mamanger saka sayatenya temaitsü angutsübo imlartem Yisui aitsür, kechiyong Pai parnok temulungjangji meteta lir. Item ama nisungtem jagi sayatenya anguba mapang aser anogo nungbo Tsüngrem dak amangtsüa akok, saka iba mapang aser anogo süitemerbo Tsüngremji amadoker. Iba jagi Yisui asenok toktsür aor. Atangji, tanü putu nunga asenok ya Tsüngrem dak masü sayatenya dak amangba purtem lir. Asenok anema junga ali tashi mashimashi alitsü, asenok kaa-itta ali tashi asenoki Tsüngrem mebiletettsü, asenok lendong timtem ka agi menokdang tashi asenoki sarasademtsü mebiletetter. Ajisüaka, kodang asenok shirangdir, sayatenya agi anepner aser timtem lendong ajurudanga sayatenya nung kümzükner. Idangjibo, Farisi nungertemi meshiba amaji asenoki sayatenya meshir. Item ama purtem dang tamajunger aser nüktapangta benschirtem ta ajar aser Pai asenok toktsür aor. Aiben asenoki tanüla sempet aketer jaa Tsüngrem dang asenok asoshi sayatenya meshidaktüsür. Ajisüaka, Laishibai ashir, Yona nem agütsüba temaitsü dak alaka tanga temaitsübo magütsütsü. Tetezü Tsüngrem dak mamanger ser nung sayatenya meshirtem asoshi Yona nem agütsüba temerenshi temaitsü dang angutsü. Tsüngrem dak amangba tamang jenjang asadanga nungbo, Tsüngrem nungi sayatenya memeshiba aser sayatenya dak mamangba tamangjiang tuluba lir ta angateter. Iba ama tamang tulu agi alima chuba tsüngdang tamangertem Shadrach, Meshach aser Abednego nungertemi jembiba tatalokba ka Daneil tapu 3 nung shia angur. Parnoki Nebuchadnezzar chuba dang ashiba o nung, par aseme Yihovah Tsüngrem dak amangba tamang jenjang jangjajangjaa angur. Par aseme chuba dang ashi, " Oh, chuba, ajiang, ozü Tsüngrem shiba onoki tenzüker, Pai milak adoka aliba misem nungi onok kümzüksü koka lir, aser Pai onok nü ket nungi kümzüksü. Aji oda, mesüaka, oh, chuba, nai ya metetang, onoki nü tsüngremtembo metenzüksü aser nai yangluba hon süngyangluji mekülemtsü." Daneil medemer par aseme parnoki amangba Tsüngremi parnok alima chuba ket nungi kümzüksü ta kanga junga amanga liasü. Ajisüaka, par aseme Nebuchadnezzar dang ashiba dak alaka, Tsüngrem dang par asem kümzüksüsa alima chuba matsüngdang sayatenya inyaka sayuang ta masüngdang. Ajisüaka, parnoki ashi, Tsüngremi parnok alima chuba ket nungi mekümsükyonga, tanga alima tsüngremtembosa mekülemtsü. Iba tamangji koda tulu aser koda jangratemtsüka. Asenokia, Tsüngrem dak amangtsü asoshi sayatenya nungdaker asü, mesüra Pai sayatenya mesayuaka, pai maneptsüaka, mesüra Pai alima lendong nungi mekümsüaka, Kibuba Tsüngrem daksa amangtsü ta shitetter. Joko, ibai sayatenya dak amangba putu masü saka Tsüngrem dak amangtsüba putu. Sayatenya dak amangba agi masü saka Tsüngrem dak amangba agi asen temang aser tanüla kümzüker.

OLEMSABANG

Khristar arogo nungbo telemsa kecha malitsüla

~ L. Kika Pongener.

Tanü asen lima nung arogotem tia asadanga reprangdangra, arogo aika temai madok telung nung meputep, tsükchitep aser telemsa agi sunga aliba angur. Talisa, Ao arogo teimba ka, tenung agibo Khristar arogo, saka Khristar arogo memesuk, arogo nung Yisu Khrista jakla meshi-meshia samadoker, alima tashi nem anidaktsüba aser moksepdaktsüba ngua kanga sasaa bilemer. Ano kanga tesasatsüka, arogo aika nung toklang tenzüker tsüngda meputepba aser tenzüker aser tenzüklatem tsüngda nunga meputepba ngua kanga sungmanger...!!! Surabangla, arogo ka nung tongti lennirtem tsüngda nunga meputepba...Kodaser arogopurtem dang longjema/putepa liang...ta sayutsüngitsü...??? Aser iba ama meputep aser tsükchitep agi sunga aliba arogo nungji kodaser teronem tanang adoktsü...??? Iba ama arogo ka nungji koda sur Tsüngrem sentsüwangshitsü...??? Arogo ka nung Khrista jakla samadokra, iba arogo dangji Khristar arogo...ta majatsü. Tsüngrem oi ashir, "Arogo-ji pongmen sushia, kangtenba sushia, ibala kecha makai, temeshi aser tai makai litetsü; Pai iba sentsüwangshi arogo nem agutsütsü asoshi ; Khristai arogo dang meim aser pei sasa iba asoshi bendanga agutsü" (Efesa-5:26-27).


Asenoki tasen lai nung Paul shiti nung züngra, tenyartem mapang Korint arogo telung nung telok pezü-su küma lemsar liasü. Ashiko, arogo balala küma lemsaba masü, saka arogo telung nung tamangertem tsüngda nung telemsatep liasü sudi. Anungji Paul-i Korint nungger dangi tekümdangtsü o shia züluba angur. Korint arogo nung tongtipangsa telemsa adokbaji arogopurtem rongnung..Paul telok, Apolo telok, Kefa (Peter) telok aser Khrista telok...ta lemsar liasü. "Nenok nisung shiai yamai ashir...Ni Paul nübu; Ni Apolo nübu; Ni Kefa (Peter) nübu aser Ni Khrista nübu" (1 Korint-1:12-13). Korint arogo nung aliba arogopurtemi aibelena anagatetbaji, parnoki Paul, Peter aser Apolo nunggerji Tsüngrem ama kümdaktsü, aser arogopurtem rongnung telok balala küma telemsa adok. Tanü asen lima nunga, ashiko, arogo karbo Korint arogo ama telung nung telok-telok lemsar alitsü akok. Aji oda, Tsüngrem lartem atema-a kanga tetsübotsü aser tekümdangtsü tulutibaji, Korint arogo nung ama, arogo nung ne telok...ta ne tenung jateta telok lemsara...Na atema-a aji Tsüngrem tsüngdang khuret tulu asütsü. Aji oda, arogo nung petsaperong, mepetmesu, telemsa adoktsüsa toklang tenzüker, tenzüker, tenzükla, mesura arogopur kari tongti shilem agia inyakra...Tsüngrem tsüngdang khuret tulu asütsü.

Ano Korint arogo nung ashiko, Tanela sempet akartem tsüngda nunga telemsatep liasü sudi. Iba atema-a Paul-i tekümdangtsü o shia züluba angur. "Tanela sempet tapu-tapu lir, saka Tanela ka dang. Aser tenzüka tapu-tapu lir, saka Kibuba ka dang. Aser mapa tapu-tapu lir, saka Tsüngrem shibai ajak nung ajak inyaker pa ka dang lir" (1 Korint-12:4-6). Ajioda, Tanela sempet akartemji arogo nung nukdang tajung ka-ka asütsüla aser arogopurtem, toklang tenzükertem aser tenzüker/tenzüklatem Tanela o agi ajungshitsüla. Aji oda, parnoki tanela nung nungita yaritsü melena, parnok tsüngda nunga lemsara, mesura parnok ajanga arogo nung timtem/mepetmesu adokdaktsüra...Tsüngrem tsüngdang khuret tulu angutsü. Aji oda, Korint arogo nung aropurtem tsüngda nung telemsa adokba agi, Tsüngrem o-jia nisung o ama kümdaktsü sudi, mesura tamashi o kümdaktsü sudi. Yongji Paul-i yamai züluba angur. "Kechiyong shirnok samadagi parnok asoshi kangki o-ji tamashi o; Saka asenok kümzüka alirtem asoshi-bo ibaji Tsüngrem ain lir" (1 Korint-1:18).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Nigeria nung puer aoba Evangelical Pastor, Rev. David Musa tepsetogo



Rev. David Musa

Abuja (Nigeria), November 18 (Agencies): November 11, 2023 nü Nigeria kübok Kogi state nung kiralongrartemi pastor ka puer oa liasü; kiralongrartemi meshiba ama Arogoi sen agütsü saka kiralongrartemi pastor mechiki tepsetogo, ta osang ka ajanga metetdaksü.

November 11 nü Lokoja County kübok Obajana area nung kiralongrartemi Evangelical Church Winning All (ECWA) nung pastor, Rev. David Musa par alu nung lia puer ao aser November 14 nü kiralongrartemi pa tepset, ta Arogo züngsem, John Emmanuel-i metetdaksü.

Osangbener den jembidang Emmanuel-i, "Ni tejashi nung iba osang ya sangdonger. ECWA Arogo, Obajana nung ozü pastor, Rev. David Musa Honibarnü par lu nung lia kiralongrartemi puer oa liasü. Pastor chioktsü atema parnoki akhangba ama Arogoi senji agütsüogo, ajisüaka parnoki pa tepset," ta metetdaksü.

Emmanuel-isa, "Yimlibilema par kibong aser Arogo, ECWA Obajana Local Church Board aser ECWA church denomination atema sarasademjang," ta metetdaksü.

Arogo züngsemtemi ashiba agi, kiralongrartem jagi pastor chioktsü atema naira sen million 20 akhang, ajisüaka Arogoi agütsüba naira sen million 1 parnoki agizük.

Arogo züngsem Stephen Danladi-i, "Arogoi kiralongrartem nem naira sen million 1 agütsü saka kiralongrartemi Rev. Musa tepset. Kiralongrartemi akhangba ama Arogoi naira sen million 20 magütsütetba agi parnoki pa tepset," ta metetdaksü.

Kiralongrartem jagi pastor chioktsü atema naira sen million 1 ji agizüktsü melunga liasü, iba sülen Arogo züngsem ana pa agizüktsü atema ao, ajisüaka par asem meyipa aruba mapang kiralongrartemi pastor kaset, ta Arogo züngsem Mary-i metetdaksü.

ECWA Obajana District Church Council-i sangdong ka ajanga, "Onok kanga jashir, ajisüaka iba ya Tsüngrem sentong liasü ta onoki agizüker. Asen adianu, Pastor Musa David puer aoertemi Mongolbar aonung naira sen million 1 agizükba sülen pa kasetogo, ta onoki tejashi nung sangdonger," ta metetdaksü.

Council-isa, "Asenoki par kibong, Arogo aser District Church Council atema sarasademtsüdi," ta mepishia metetdaksü.

Arogo züngsem, Danladi-i, "Khristantemi pa chioktsü atema sarasademja liasü. Pa asübaji Khrista melung liasü, ta tangatetba nung Khristan ka ama pa asübaji onoki agizüker. Asenoki maneni par kibong aser Arogo atema sarasademtsüdi," ta metetdaksü.

November 16, 2023 nü Kogi State Police Command otongdar, William Ovyé Aya-i, "Iba tatalokba osang ECWA-i onok nem metetdaksüba sülen onoki bushisügang tenzükogo. Pastor Musa tepsetertemi onoki aputsü, ta onoki Arogo dang nangzük," ta metetdaksü.

2022 küm alima nung Khristantem teimtiba tepsetba linükji Nigeria liasü; yaküm Nigeria nung Khristan 5,014 tashi tepsetogo, ta Open Doors' 2023 World Watch List (WWL) report ajanga metetdaksü.

Yaküm Nigeria nungsa Khristan 4,726 puer ao aser Tenla ki-a aika raksaja liasü.

2023 World Watch List report ajanga ashiba agi, alima nung Khristantem alitsü linük tamajungtiba 50 rongnung yaküm Nigeria linük ya jenjang 7buba nung liasü saka takümbo jenjang 6buba kümogo.

ANO GO ABEN TSÜNGREM DEN

TESENDAKTEP TAJUNG

Aser pai parnok dang anasai aja aser ashi, "Ni nenok tenu Yosef, shiba nenoki ljiip nunger dang ayok. Lipok 45:4

Meimchir ka taküm alima nung alidang, nisung aika ajurutsü. Item rongnung tsürabur, adianu, kinunger aser medemertem den taküm piyong asoshi tesendaktep tajung yanglutsü akoktsü. Tesendaktep yanglutsü asoshi tasa kechi sa nüngdak? Tesendaktep tajung pasasa adoker masü saka yimya tajung nüngdaker. Ochi, temeim, aria bilemba, mulungtok, khuret bentetba, teimla akaba ajanga tesendaktep tajung yanglutettsü. Tesendaktep tajung nung lemsatepba aser anepalubaji kanga tongtibang lir.


Tsüngremi asenok kija masü nisung balala den meyoktepba alitsü yanglu. Mapangtem süitema oaka meraksaba tesendaktep tajung yangluba nung shilem tajung agidar asü. Yosefi pa tebu, tedinungertem den tesendaktep tajung yanglutsü asoshi mera tajung agi. Pai parnok koda kümzüka ayutsü aser yawara mapang chiyungtsü peria agüja mesütsü pai sentong atong.

Tesendaktep tajung akaba nung pei asoshi dang masü saka tangar asoshia bilemer, agütsür aser lenmang ajak nung yariteper. Barbara Bush-i ashi, "Nisungtemden tesendaktep apayuang ne tembartem adianu aser kinungertem." Tanüa nai nisung kar den tesendaktep tajung yangluba nung komala mera agitettsü; sarasadema bilemdangdi..

SARASADEM:

Kibur Tsüngrem, adianutem den külemi telungjem nung alitsü koda tajung aser jangratementsü, nai yariangma. Amen.

Yaküm Europe nung Khristantem anema inyakba tatalokba 749 liasü



November 18, 2023: Yaküm Europe tesem ajaklen Khristantem anema inyakba tatalokba aika liasü; item tatalokba rongnung Tenla ki densema Arogo meyong kiojen rongdoktsüba, Khristantem amokmerenba, azükba aser tepsetba densema lir, ta Observatory on Intolerance & Discrimination Against Christians in Europe teloki

metetdaksü. Vienna nung amenoka aliba Observatory-i tesüiba küm ter tashi Europe nung Khristantem anema inyakba tatalokbatem osang bendena arudar.

Observatory indang 2022/23 Annual Report ajanga, 2022 küm Europe nung aliba linük 30 nung Khristantem anema inyakba tatalokba 749 liasü; item rongnung Khristantem dak azükba tatalokba 38 aser Khristantem tepsetba tatalokba asem densema lir, ta metetdaksü.

2021-2022 küm nungbo Europe nung Khristantem anema inyakba tatalokba 519

dang liasü. "Khristantem anema inyakba tatalokbatem osang aika memetetdaksür, anungji Khristantem anema inyakba tatalokbatemji iba dang nungjagi teimba asütsüa akok," ta parnoki metetdaksü.

Kasa report ajanga, "Pei tebilemba sadoka jembiba temeden ya tang tashi o entepba onük ka lir, kechiyong yimjak nung o jembiba azioktsü atema ozüng tasen benoktsü meranger. Abortion clinics temeket nung 'buffer zones' sangdongba ya-a item ama ozüngtem rongnung ka lir; iba ozüng kübok lenmang nung Khristantem ola madoki sarasademba-a nokdang," ta metetdaksü.

"Ozüng tasen benokba ajanga Khristantem yimsü temeden-a kongshir. Item ama ozüng ajanga tsüraburtem, pastor tem aser tesayurtem-a alentsü," ta report nung shia lir. "Ukraine nung rara ya

tebilemtsü onük ka lir, aser iba rara ajanga region nung yimsü temeden-a kongshio. Tatalokba aika yimtenren aser kin tsütsülen nungi lir, ajisüaka itemji ajanga Khristantem bendangshidanga züngshi tenzükogo. Russia ketdangsertem aser sepaitemi yimsü temeden anema Khristantem tekülem ki shibangtsür aser pastor tem puer aoer mesüra apur. Iba rara (Ukraine rara) ajanga Europe nung aliba linük aika nung Orthodox Khristantemi timtem ajurur," ta metetdaksü. Ano külen Ukraine-ia Ukrainian Orthodox Arogo anema inyaker aser putirtem apur, kechiyong Orthodox Arogo ya akhidang nungi Russia den tesendaktep aliba Arogo lir, ta kasa report ajanga metetdaksü.

Europe nung Khristantem anema inyakba kanga bulua akümba atema tebilemtsü kaa

Observatory-i sorkar ketdangsertem dang ozüng tasen yangluba mapang nung lokti tentet balala aser yimsü telok balala den tongtepratepa tama jembitsü mepishi.

Observatory-isa sorkar ketdangsertem dang meimchir temeden atema inyakba rejutem nem Khristantem anema inyakba mapatem mita reprangdaksütsü aser Khristantem anema inyakba nokdangtsü mepishi.

Iba dak alia Observatory-i osangbenertem aser lokti tentet balala nungi lenirtem dang Khristantem anema inyakba osangtem bendentsü aser Khristantem anema inyakba indang awareness agütsütsü mepishi.

Ano külen Khristantem aser Arogo temeden balala metata alitsüla aser pei temeden nokdangertem anema ola adoktsüla, ta Observatory-i metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Semsem

(adj) mopung anepanepa aonba (gentle wind)

* Lemiba mapang mopung semsem dak anizüngzüker.

Semsemyangyang

(adv) merükmeju mali, tesempatsüka (dirty, untidy)

* Semsemyangyang alidak tesem nung tashidak menar.

OLONG PAITEP # 6618

15x15 crossword grid with numbers 1-17 indicating starting positions for clues.

TIPLÉN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6617 TELANGZÜBA

TIPLÉN

- 1. Ashioktsü, 3. Sotak,
5. Nai, 6. Ate, 8. Lemtur,
11. Nungit, 12. Ong, 13. Nok,
14. Yimsü, 15. Noksajong.

LANGTSÜNGLEN :

- 1. Atsülang, 2. Sanen, 4. Rama,
6. Arang, 7. Awatsüng,
9. Ngüm, 10. Pokpo.

NAI-A YA METETTER MA



November 19, 2023 Deobar nungi Arunachal Pradesh nung 6 buba Northeast India Fashion Week - The Artisans Movement tenzüksü. Iba sentong ya Jollang, Itanagar nung aliba Koro Happa River Island nung agitsü aser anogo asemnü sentong nung designers aser artisans 30 ajanga shilem agitsü ta Designer & CEO Yana Ngoba Chakpu-i ashi. Iba sentong ya One Arunachal ta ser registered NGO ajanga ayonger aser iba telok yagi Arunachal Pradesh nung sobaliba wazüka ayuba mapa inyaka arur. Northeast India Fashion Week lapokba sentong nung Arunachal Pradesh chief minister Pema Khandu, minister Techi Kaso aser Tripura minister Bikash Debbarma nunger adentsü.

**Churachandpurnungtanurtemnem
educationalaidagütsü**

Imphal, November 18, 2023 (Agencies): May 3, 2023 nungi Manipur nung kin o kin mangatetep adokba ajanga tanurtem dak kanga mejungi kongshiogo.

Iba rara ajanga nisung 61,000 shi kati pei talidak toksür aotsüsa akümbe nung tanur 23,000 densema lir.

Tanur aika relief camps aser fabricated houses nung jenoka lir aser parnok jangratema malir.

Tesüiba ita tenet tashi parnok shisaliok angazükba nung timtem kanga ajurua arur aser temang mejungi lir.

Churachandpur district kübok DorcasVeng YPA Relief Camp nung jenoka alirtemi essential items alemba sentong ka ayonga agi.

Iba sentong ajanga nisung 68 tajangzük angu aser parnok rongnung tanur 18 dena lir.

Tanurtem nem educational aids, including notebooks, stationery, world maps, easel boards with stands, writing boards, marker pens, erasers aser pencils agütsü.

Headquarters Inspector General of Assam Rifles (South) ajanga iba sentong ayonga agi.

MOLUNGNEN O



10-05-1932 - 11-11-2023

Onok ajak asoshi akhumdong tsurabur asür SUTSUNGKABA (Asangma) akhumli tembanger mangyim jashi khuret tulu agi sünger alidang Asangma Arogoi anir lokti balala kiyonger tembar temeimertem aser senso tajungtem shirnoki nübo shisatsü rongsen aser sarasadem agi nungita yariogo nenok ajak dang ozü mulung taroktiba nungi pelaba lemsateper. Tulusang Tsüngremi nenok ajak moajangma ta sarasademtsür.

- Temeim chirnurtem, semchirtem aser kinungertem.

United Opposition Forum (UOF)-i Dec 1 nungi election mapa tenzüksü

Guwahati, November 18, 2023 (Agencies): Assam nung Congress-i aniba party 15 United Opposition Forum (UOF) ajanga December 1 nü Lok Sabha election atema yimyim ayimoktsütsü.

Assam nung opposition indang tongtipang onükji Chief Minister'er kibong indang ochimashi asütsü ta UOF general secretary aser Assam Jatiya Parishad (AJP) president Lurinjyoti Gogoi-i ashi.

"Onoki Assam nung BJP-i aniba sorkar aser Chief Minister anema chargesheet ka yangludat aser yakta renemtsü. Onoki November 30 nü Dibrugarh nung senden amendang iba ya lemsateptsü" ta pai ashi.

Sangküm Lok Sabha election atema common minimum programme ka

renemtsü aser ibajia Dibrugarh senden nung benoktsü ta Gogoi-i ashi.

"Chief Minister-i United Opposition den tokteptsü tsübur" ta Assam Congress Legislature Party (ACLP) deputy leader aser taoba minister Rakibul Hussain-ia ashi.

"Upper Assam nung parnok jenjang tamajungtiba lir. Chief Minister-i Lower Assam nung kechi ataloker ibaji jembir" ta Hussain-isa ashi.

"BJP-i teti Hindutva indang jembir saka parnoki kechiba Ajmal mapur" ta UOF chief spokesperson aser Rajjor Daal president Akhil Gogoi-ia ashi.

"Election tonga aruba mapang BJP-i lokti t e b i l e m t s ü t e m mebilemdaktsütsü atema telok o telok tsüngda tesempatep adokdaktsütsü meranger. Iba

atema parnoki Ajmal amshir" ta paisa ashi.

United Opposition Forum senden nung tawa media nung tebilemstü aika lemsatepba indang benoka jembir.

Iba senden nung APCC president Bhupen Kr Bora, CLP leader Debabrata Saikia, deputy leader Rakibul Hussain, Rajya Sabha MP Ajit Kumar Bhuyan, Rajjor Daal president and MLA Akhil Gogoi, AJP president Lurinjyoti Gogoi, Assam TMC president Ripun Bora, Aam Admi Party state coordinator Dr Bhaben Choudhary, NCP leader Jatindra Nath Bordoloi, CPI leader Kanak Gogoi, CPM Suprakash Talukdar, APHLC leader Bikram Hanse, CPI(ML) leader Pankaj Kumar Das, AIFB leader Mihir Nandi aser Shivsena (UBT) leader Ramnarayan Singh.

NSCN (K-YA) züngsem ka aser overground workers 2 apu



Itanagar, November 18, 2023 (Agencies): Arunachal Pradesh kübok Changlang district nung Assam Rifles sepaitemi NSCN (K-YA) züngsem ka apu.

Assam Rifles sepaitemi NSCN (K-YA) züngsem den külemi overground workers

ana apu. Indo-Myanmar arrtsü anasa Jairampur circle nung par asem apu.

Parnok ket nung Rs 5,60,000 aser prangpong-injangtem ngutetogo.

"Assam Rifles-i NSCN (K-YA) ka aser Overground Workers ana apuba ajanga

telungpurtem arrtsü adena aitba noktangogo. Indo Myanmar arrtsü nung parnok ket nung black money Rs 5,60,000 aser prangpong-injangtem ngutet" ta Assam Rifles sangdong ka nung metetdaksü.

Gaza telungi anogo nung totzū trucks ana yoktsü: Israel

Tel Aviv, Yimpoksüi/Nov. 18 (Agencies): US-i ajungshiba sülen Israel-i anogo nung totzū trucks ana Gaza Strip telungi idaktsütsü ta shiogo.

Anogo ana nung totzū litres 140,000 shi yoktsü melatsü ta US State Department ketdangsür kati ashi.

Item ya timba teyari agütsüba trucks aser UN-i tajemtsü tzü aser sanitation agütsüba yaritsü asoshi lir, ta ketdangsüri ashi.

Tanungba ya mobile phone aser internet services asoshi lir, koba totzū maliba agi shibanga lir.

UN indang Palestinian refugee asoshi agency, Unrwa ajanga totzū tera agütsüba sülen service tanaben agütsür ta Gaza nung communications agütsüba company kati Hokulbarnü ashi.

Iba totzū agütsütsü tezüngzüktep yanglutsü atema Washington-i Israel dang kanga ajungshia liasü, ta US ketdangsüri ashir.

Iba tezüngzüktep ya tepang agibo hopta ishika jakdang molungteper liasü saka kuli ana mechi Israel-i menu ta ashi. Southern Gaza nung totzū merongma aser pua alirtem chioiktsü asoshi mezüng jembidangnüa Israel ketdangsürtemi US dang shia liasü.

Totzū peria maliba ajanga inyakyim ajunga anena atatsü akok, ta Unrwa ajanga Brehostibarnü shia liasü.

Tang tesüsa Unrwa ajanga osang ka nung ashiba agi, humanitarian operations asoshi anogoshi totzū litres 160,000 nüngdaker, aser ibaji molungtepa aliba dang anasü

agi timba lir. Tang totzū agütsüba ya Rafah crossing ajanga southern Gaza Strip nung civilian tem nem UN-i agütsütsü saka item totzū ya Hamas ket matongtsüla, ta Israel ketdangsür kati shia liasü.

Tashidak adokba nungi jenbuttsü mechi totzū yagi tzü, kilentzü aser sanitation system nung tera yaritsü ta Israel ketdangsüri ashir.

Alima nung lokti tentet balalai Gaza Strip nung humanitarian situation adoker ta khuret lemsatepa arur.

World Health Organization (WHO) ajanga taoba mapanga Gaza nung tashidak prokshia aotsü tsüboa bilemba lemsatepa liasü, kong totzū maliba aser Israel nungeri tanen makai bomb pokloktsüba ajanga healthcare system aser sanitation facilities nung tetsükdaktsü kanga ajuru.

Palestinian Territories nung WHO representative, Richard Peeperkorn-i Hokulbarnü ashiba agi, yangji acute respiratory infections indang cases 70,000 dak tema aser saksüpokshi cases 44,000 dak tema lir.

Gaza nung totzū ya desalination plant, mozüki aser nisung aliba kidang electricity agütsütsü, aser sanitation, transport aser communication infrastructure atema nüngdaker.

Iba tesem anasa teyari oset balala agütsütsü asoshia kanga tongtipang lir.

Gaza-i totzū bener aiba Israel-i nokdanga arur aser item ya Hamas-i auyaa raraba nung amshitsü akok ta ashir.

Tang rara ya metenzükdang

Gaza nung electricity timba Israel-i agüja liasü aser kar yangji power plant ka aliba nungi agizüka amshi, saka tangbo shibangogo.

Gaza south tsütsü Khan Younis nung aliba Nasser hospital indang director-i Honibarnü ashiba agi, Hamad yimti nung nisung aliba ki ka nung tayimtsü amshia amakba sülen parnokki nisung tasümgang 26 aser kanga sashia yirur nisung 23 parnok dangi anir aru.

Iba osang dak sendakba nung Israel mitkar temi kecha shia mali.

Ano Red Crescent-i ashiba agi, West Bank kübok Nablus yimti nung aliba Balata refugee camp nung Israel nungeri tayimtsü amshia ki ka amakdang Palestine nungeri nisung pongu asü.

Israel army temi iba osang repringshir ta ashi.

US Secretary of State Antony Blinken-i Israel dang West Bank nung tekeraba nung tensa tajemba kimdaktsütsü ashi.

Israel mitkar temi West Bank nung tesem ana nung khatepdang telungpur nisung tenet shi tepsetogo ta shir anogo ka lir iba tesem ya amak.

UK, US aser danga linüktemi kiralongraba telok ta nokdanga aliba Hamas-i October 7 nü Israel nung nisung 1,200 shi tepseter ano nisung 230 pua bener aoba sülen Israel-i tang Gaza nung military operation ya tenzük.

Israel-i tayang kepzüka amak tenzükur iba tesem nung nisung 12,000 dak tema tepsetogo, ta Gaza nung Hamas meyong health ministry ajanga ashir.

MOLUNGNEN O



Asur S. TERALILA.

TASOBA : 10th December 1926 - TASÜBA : 8th November 2023.

"Tetsür aikati temsüa inyakogo, saka nai parnok ajak ajatetogo" Apijemtsu shin 31 : 29.

Kodanga amatsü makokba terajem, tagutsünü aser temeim agi moshia aliba ojala asür S. TERALILA Waromung Compound, la shirang yipten mapang nungi tenzüka, iba akümüli wadang toktsür aoba anogo tashi nung Kija, tembartem, kiyonger, lokti balala, yimer yimsangertem, ana aser talang nungi shirnokisa sarasadem, rongsen, nübu, shisatsü agi bendanga yaritepba den, ozü mangyim tia nung alidang onok mulung sünepdakja asükhu lemsatepba asoshi nenok ajak dang kanga pelaba lemsateper.

Onoki nenok tsüngdong tonga arua pelaba meshitetaka, nenok mapa tajung Ozüi kodanga mamadoktsü. Asen Teyanglur Tsüngremi nenok ajak moajang ta Ozü Sarasadem.

~ Temeim Chinur, Semchir, Anükapang aser Kinüngertem.

PELABA LEMSATEPER

Wabong P. Alem Jamir Changtongya yimtiba nungi East Dimapur Ao Baptist Arogo nung Secretary Cum Cashier inyaker. ABAM 2023 "Book of the Year" Kaket tenüng "Arenlung" züluba nungi senpet anguba pelaba EDABA nung amangbapur ajak



tenüng nung lemsateper. Pa ya asen Aor rongnung Tetsü oshi wazüka ayutsü nükjidong nung Kaket aika zülur nüngtuku teyakyak den tanü lanur putu asoshi shisalen tajung agütsütetba kaket zülur tajung ka. Ano iba den pai züluba kaket asen Aor lanurtem asoshi kaket rejutem nung amshitsüsa zülutetba angur. Asen teyanglur Tsüngremi pa taküm aser sempet tajung tarutsü aso jenti temoatsüba südakjang ta sarasademtsür.

Rev. Jongpong Imsong
Pastor, EDABA.

US State Department ketdangsür anema Khan-i ken o benoktsü

Islamabad, Yimpoksüi/Nov. 18 (Agencies): Pakistan nung aliba court tem nungi temeden mongura US nung State Department ketdangsür Donald Lu anema Imran Khan-i ken o benoktsü, ta teyi Aleema Khan-i ashi.

Arishi küm 71 tain aser Pakistan Tehreek-e-Insaf mendenpuba Imran Khan ya tang cipher case nung Rawalpindi nung aliba Adiala jail nung yua lir.

Cipher (secret diplomatic cable) nungya Assistant Secretary of State for the Bureau of South & Central Asian Affairs Donald Lu densema US State Department ketdangsürtem aser Pakistani envoy Asad Majeed Khan nung taoba küm senden amenba indang dena lir.

August 2018 nungi April 2022 tashi Pakistan indang ato kilonser inyaksang Khan ya US-i tasa yanglua par sorkar atsügdok ta jembitsü mechi cipher nung aliba meshidaki amshi ta tai tonglokja lir, aser Washington-i iba taittsüba magizüker.

PTI tekolakba teyi-i Adiala Jail nung pa den ajurutepba sülen osangbener senden ka nung iba o ya ashi, ta Geo News ajanga Hokulbarnü ashi.

"Pakistani courts nungi ochi



Imran Khan

obendang mongutetra parnokki Donald Lu anema US courts nung ken o benoktsü ta PTI mendenpubai ashi," ta Aleema-i osangbener dang ashi.

Khan sorkar laodaktsütsü tasa yangluba nungya Pakistan nung aliba US embassy dena alia ma party-i amanger, ta laisa ashi.

Mongulbarnü Islamabad High Court (IHC) ajanga iba ken o nung Khan anema 'stay order' agütsü, aser high-security Rawalpindi prison nung ken o jembitsüsa akumba tensa indang osang meshir.

IHC ajanga stay order agütsü aser tasüba temerenshi agütsütsü mesüra takum tepiyong tepuokdak ayutsüsa iba ken o nung ojang kar inok, ta Aleema-i ashi.

"Item ojang inoktsüsa PTI

chairman-i kechi mapa tamajung inyak aji onok dang ashitsüla. Rana Sanaullah (Pakistan indang taoba federal minister for interior) ajanga PTI chairman anema ken o ka benok aser Pakistan nung temeden angutsüla," ta lai ashi.

Khan temang junga lir aser pa indang chiyongtsü atema ashishiba kecha mali, ta Aleema-i ashi.

Khan tembar aser taoba foreign minister Shah Mahmood Qureshi ya cipher case nung apu aser Adiala jail nung yua lir.

Saka Khan aser Qureshi nati aibelen inyaka mali ta ashir.

Washington nung aliba Pakistan embassy ajanga March 2022 nung secret diplomatic cable amshidang Official Secrets Act nung aibelen ta tai tongloktsüba nung ajemdaker tena den tepuokdak ken o jembitsü Pakistan indang caretaker government-i mela.

Parnok anema Federal Investigation Agency ajanga August nung ken o benoka liasü.

Khan ya April 2022 nung no-confidence vote ajanga ato kilonser menden nungi atsügdok. Iba sülen pa anema ken o 150 dak tema benoka lir.

Finland-i Russia den arütsü shibanger

Helsinki, Yimpoksüi/Nov. 18 (Agencies): Moscow-i ajungshia asylum bushirtem tali akuma anendaktsütsü meranga Finland-i Russia den arütsü alema senzüba tesem pezü shibangogo.

NATO nung adenba mechi tayang kepzüka par kidangeri migrant tem arütsü alema yoker ta Helsinki-i tai tongloktsür.

Külen Kremlin odongtar Dmitry Peskov-i ashiba agi, Finland-i aibelen mapa tulu inyaker aser linük ana tsüngta tesendaktep raksar.

Tan hopta asylum bushir nisung 300 shi Finland tonga aru, ta arütsü anüker temi ashir.

Finland south-east tsütsü Vaalimaa, Nuijamaa, Imatra aser Niirala arütsülen Hokulbar aonung ayatirm nungi tenzüka atsü inoktsü, ta Finnish Border Guard ajanga ashi.

Syria, Yemen aser Iraq densema linük balala nungi nüburtemi ozüng alema item tesem ya ajanga aitba tali akumer.

"Linük ana tsüngta tesendaktep raksatsüba lenmang nung Finnish ketdangsürtemi jajaba asoshi sasaba lemsar," ta Peskov-i ashi.

"Tanü putu nung Russia-i kodanga Finland amokmeren masü, aser rarapangsentsü kuli kecha mali. Tang parnokki iba lenmang shim. Onoki ashitsüba ibai aibelen tulu lir."

Kuli kaket tejangja meliaka Russia-i nisungtem arütsü alema

yokba nung yarir, ta Finland indang Ato Kiloser Petteri Orpo-i tai tongloktsü.

Arütsü alema senzüba tesem shibangogo aser Finland indang far north tsütsü Salla aser Vartiuss nung alirtemi asylum applications agütsütetsü, ta Orpo-i ashi.

Asylum bushir nisung 100 Hokulbarnü Finland tonga aru, ta arütsü anüker temi ashir.

Finland ketdangsür temi ashiba agi, parnok linüki aruba nisungtem ya Russia tashibo ozüng agi melaba ama arur aser arütsü alema Finland aiter aser asylum bushir.

Russian ketdangsür temi tasa yanglua arütsü alemdaktsür ta ato kilonseri aitsür.

"Arütsü anüker temi parnok ya arütsü tashi meina arur mesüra anir arur aser parnok yariba tejangja lir," ta Orpo-i Mongulbarnü shia liasü.

2021 kuma migrant meyerijang aika Russia tembar Belarus linüki aru aser European Union nung züngsem linük Poland aser Lithuania telungi ai. Iba mapanga Belarus lenir Alexander Lukashenko-i bloc tashi mait kumdaktsütsü meranga linük danga nungi aruba nisungtem ya züngsem 27 aliba bloc nung anioktsüba nung yarir, ta EU-i aja liasü.

Finland ya Russia den arütsü mile 833 lir, koba Europe nung talangtiba alitsü.

Revenant FC-i Mokokchung Football League Season 4 marok benogo



Mokokchung Football League Season 4 marok abener Revenant FC tetushi Tejaoker Comandant,12 Assam Rifle Mokokchung Col.Rahul Gurung aser MFL achayangertem külemi tangokba noksa.

Mokokchung, November/ Yimpoksüi 18 (TYO): Mokokchung Football League(MFL)Season 4 buba tanu tatembangbuba asaya Revenant FC aser Wasang FC tsüngda asaya aser iba asaya nung Revenant FC-i Wasang FC kukteta liasü.

MFL Season 4 asaya aruba nung Revenant FC-i Match 10 asayaba nung points 26 nguteta takok marok benogo. Iba den Wasang FC-ia Match 10 asayaba nung Points 19 nguteta tanabuba

jenjang ajangzükttet. Revenant FC-i takum agi iba MFL Trophy pezüben asaya aruba nung pezübenprongla parnoki dang takok marok abener.

MFL nung Champion Revenant FC-i takok marok den sen Rs.15000/- aser Runners Up Wasang FC-i tanabuba marok den sen Rs.15000 agizük.

Iba MFL Season 4 nung senpet agizükertemji: Fair Play : Revenant FC Best goalkeeper : Tiasünep (Terokroker)

Best defender : Joythy Pongen (Wasang FC)

Highest goal scorer : Rongsenchiba (Revenant FC) Player of the tournament : Nokchashilu(Revenant FC)

Tanu iba asaya tembanger senpet agütsüba sentong tatsüka agidang tetushi Tejaoker Comandant,12 Assam Rifle Mokokchung Col.Rahul Gurung liasü aser pai tayongzükba aser tepela o tatsüka jembir kelen takok angurtem nem tetushi senpet agüja liasü.

2025-26 season nungi India nunga VAR amshitsü akok

New Delhi, Yimpoksüi/Nov. 18 (Agencies): 2025-26 season nungi tenzuka domestic club competitions nung Video Assistant Referee (VAR) asangang akumtsü, anungji Indian Super League aser I-League team tem asoshi tajangzük aika alitsü, ta All India Football Federation acting secretary general M Satyanarayan-i Honibarnü ashi.

2016-17 nung FIFA asayamung nung mezünguba amshiba VAR technology ya ajanga referee temi tensa pezü nung telemtetba agiba maparen nung yarir aser itemji goal agütsüba, goal agütsüba nung aibelenba, penalty asoshi telemtetba agiba aser penalty agütsütsüsa aibelenba, indang-indanga red card agütsüba tatalokba mesüra nisung aibelenba alitsü.

Australia aser United States nung mezüng amshi tenzükba sülen alima nung linük aikati parnok domestic club competitions nung VAR ya amshir.

“VAR amshitsü asoshi telemtetba tulu yakta agitsü. Iba atema shisadangba mapang lir,” ta

AIFF acting secretary general M Satyanarayan-i osangbener den jembidang ashi.

“Taruba season nungi amshitsü ya tasak asütsü, kechiaser FIFA ajanga technology ya agizüktsüla, aser yangji inyakyim kar lir. Hadir amenokba dang masü saka aji amshirtem training agiba nung mapang kanga agir.”

“2025-2026 season nungi amshitsü akok, saka ashitsü makok. Asenoki tang nungi tenzükkyonga, tajemba agi ita 18 nungi 20 tashi agitsü,” ta Satyanarayan-i ashi, shiba breach of trust nung Shaji Prabhakaran anentsüba sülen November 9 nü acting secretary general akum.

VAR technology amshiba nung AIFF rongsen jenti indoktsü, saka iba yagi Indian club tem kanga ajangzüktsü ta pai ashi.

“Sen ya kolen nungi arutsü, aji asenoki repringtsüla. Saka tatem nungbo ISL aser I-League indang club tem ajangzüktsü.”

Mapang ka-ka takok anguba aser tamakok anguba tetsüngta shilem pongu nungi ti tashi alir, anungji VAR amshiba ajanga result tajungba angutsü, ta pai ashi.

Asaya tepiyong VAR team

Davis Cup 2023: Andy Murray tapubang yiru

London, Yimpoksüi/Nov. 18 (Agencies): Tapubang yiruba mechi Andy Murray ya Davis Cup Finals atema Great Britain indang team nungi adokogo.

Britain ya November 23 nü quarter-finals nung Serbia ajurur, koba 24 ben Grand Slam champion Novak Djokovic-i anir lir.

“Ni tapubang tera yiru, anungji Davis Cup nung ni shilem magitetsü. Squad nung madenba asoshi tezü atanger, saka tang kü nükjidongji taneptsü ngua season tasen asoshi renemtsüba lir,” ta arishi küm 36 tain Murray-i ashi.

Dan Evans-a temola nung yiruba ajanga GB team nungi

adoka liasü. Pa ya Joe Salisbury-i melen aser squad nung Cameron Norrie, Jack Draper aser Neal Skupski nungertem lir.

Murray melentsü asoshi captain Leon Smith-i Hombarnü tashinung tenüng agütsütsüla, saka Draper aser Norrie na kija asaya nung shilem agitsü aser Skupski aser Salisbury na tarep asaya nung shilem agitsü imlar.

Squad nung Liam Broady bendenloktsü südi ta ashir.

Saka parok ya kija dang asayatsü amai lir, kechiaser Dan Evans aser Andy Murray masayatetba ajanga tarep asoshi renemogo.

Naga nunger anati Karate Championship nung takok angu

Dimapur, Yimpoksüi/Nov. 18 (TYO): All Nagaland Karate-Do Association nungi Aumienla L Imchen aser Huto K Yeptho nati November 17, 2023 nü Talkatora Indoor Stadium, New Delhi nung aliba KIO All India Inter Zonal Karate Championship nung takok ngua liasü.

15th NAP (IRB) Battalion nungi Lance Naik, Aumienla L Imchen-i Senior (Female) 68 kg category nung silver medal angu aser Logdrum Higher Secondary School Sangtamtila, Dimapur nung azünger Huto K Yeptho-i Junior (Male) 76 kg category nung bronze medal ngua liasü.

Euro 2024 nung Italy-i asayatsü teimla lir

Rome, Yimpoksüi/Nov. 18 (Agencies): First half nung Federico Chiesa-i goal ana agüja aser defendng champion Italy-i Hokulbarnü North Macedonia madak 5-2 agi koka tayang kepzükba den European Championship asayatsü jenjang ka anasabai ogo.

Taruba küm Germany nung iba asayamung nung shilem agitsü asoshi Italy-i Hombarnü Ukraine den asayaba nung draw dang nungdaker.

Taoba küm playoff nung North Macedonia-i 1-0 agi Italy matak takok anguba ajanga Italy ya World Cup nung masayatet.

Ajisüaka North Macedonia ya taruba küm Euro Cup asayatsü atemabo teimla mali aser Hokulbarnü Stadio Olimpico nung asayadang minute 17 buba nung Matteo Darmian-i mezüngbuba goal agüja liasü.

Chiesa-i iba sülen goal ana agüja asaya first half tembanga

liasü. Second half nung substitute Jani Atanasov-i North Macedonia asoshi tekolak agi goal ka tongloktsü aser ano paisa goal ka yoka liasü.

Ajisüaka Italy asoshi minute 81 buba nung Giacomo Raspadori-i goal ka agütsü aser Stephan El Shaarawy-ia goal ka agüja liasü.

Tang Italy aser Ukraine ya points kasa 13 nung lir, saka September ita Ukraine madak 2-1 agi akokba sülen Italy jenjang tajungba nung lir.

England-i Malta madak 2-0 agi akok aser parnok points 19 nguteta iba group takok nguogo.

North Macedonia ya jenjang pezübuba nung points tenet bener lir aser Malta ya tazüngla nung lir.

Ukraine ya Italy den Germany nung asayatsü, kechiaser Russia-i amakba mechi Ukraine nung international games masayateter.

Midfielder Jude Bellingham-i Golden Boy award angu

Yimpoksüi/Nov. 18, 2023 (Agencies): England aser Real Madrid midfielder Jude Bellingham nem 2023 Golden Boy award agütsü, koba Europe nung arishi küm 21 tekübok football asayar tajungtiba nem agütsür.

Arishi küm 18 tain Colombia aser Real Madrid forward Linda Caicedo nem Golden Girl award agütsü.

Arishi küm 20 tain Bellingham ya taküm küm tiyonglen Borussia Dortmund nungi Real Madrid-i ao aser asaya 14 nung goal 13 agüja lir.


October ita Ballon d’Or sentong nung Best Under-21 Player akumba sülen tang anu pai iba sempet ya angur.

“Birmingham, Dortmund aser tang Madrid nung ni football asaya jajaba nung shilem agir ajak dang pelaba lemsateper. Parnok medeni ibai tamakoktsü,” ta pai ashi.

“Tatemsas aser tongtipangsa ozü kibong dang pelar, shirnoki anogoshi tajungba asayatsü asoshi yarir aser ajungmesor aser meimer. Ni iba sempet tulu bener maneni asayaner. Kü sempet tajungtiba amshia tarutsü anogotem nung takok marok tali angutsü imlar,” ta Bellingham-i ashi.

Tang Chelsea nung asayasang Raheem Sterling ya 2014 küm Liverpool nungi asayadang iba sempet ya anguba sülenbo England nung football asayari iba sempet angubaji Bellingham ya dang alitsü.

Iba sempet ya Wayne Rooney, Lionel Messi, Kylian Mbappe aser



Erling Haaland nungeria ngua lir. Manchester City striker Haaland nem Golden Player Man sempet agüja liasü.

Premier League champions, Manchester City nung mezüngbuba season nung asaya 53 nung goal 52 agütsüba sülen arishi küm 22 tain Haaland-i iba sempet ya angur.

Barcelona aser Spain midfielder Aitana Bonmati nem Golden Player Woman sempet agütsü.

Arishi küm 25 tain Bonmati-i taoba ita Ballon d’Or sempet angu aser lai ani taoba küm Spanish top flight aser Champions League nung temaba jenjang ngutetba kisüng masü saka lar linüki World Cup akokba nunga lai kanga junga asayateta liasü.

Iba sentong nungya Arsenal indang sporting director Edu Gaspar nem Best European Manager sempet agütsü aser Brighton nungi Tony Bloom nem Best European President sempet agütsü.

BILEMDANGANG

“Dangar pelatsü asoshi masü saka shidak aser shidak inyakang.”